

# INVECTIVE

CONTRE L'ABOMINABLE

PARRICIDE ATTENTE' SUR

la personne du Roy Tres-Chrestien

HENRY III. Roy de France

& de Nauarre.

*Par Pierre Constant, Docteur es droicts,  
natif de Lengres.*



A PARIS,

Par FEDERIC MOREL, Imprimeur  
ordinaire du Roy.

---

1 5 9 5.

*Avec Privilege dudit seigneur.*

Case

F


39

326

1595c

THE NEWBERRY  
LIBRARY





INVECTIVE CONTRE  
*l'abominable Paricide attenté sur la  
 personne du Roy.*



CE ne sont, Messieurs, ce ne  
 sont les François Tres-Chre-  
 stiens & tres-fidelles subjects  
 de sa Majesté, qui se laissent  
 piper à l'opinion erronée  
 faulse, & heretique de ceux  
 qui soy disants enfans de la sainte Hostie,  
 soustiennent qu'il est loysible de tuer vn  
 Roy, lequel n'est approuué du Saint Sie-  
 ge: ce sont plustost ces esprits brouillons &  
 seditieux, qui sçauent bien surprendre & il-  
 luder les ignorants de ceste mesme opinion  
 abominable deuant Dieu & sa Iustice diuine,  
 & lesquels conspirent effrontement contre les  
 Roys, sous pretexte de quelques exactions  
 insupportables, & deportements particuliers:  
 Pourquoi faire, ils ont bien l'adresse & ma-



lice de susciter & dresser à leur poste quelque petit Astarot d'enfer, en luy promettant vne place en Paradis, lequel sous ombre de ces fantasmes & vaines illusions, ose entreprendre vn coup execrable, & lequel deuroit estre tenu & mis entre les pechez muets.

Et à fin de former la defense, que i'entends fournir contre ces mutins, & factieux adherants à vne si meschante & detestable opinion: En quelle part de l'Escripture sainte pourroient-ils trouuer la permission d'attenter sur la vie de ceux que Dieu a esleué sur nous, sans vne apparente vocation, expresse & indubitable? cela est la baze & le fondement de ma defense. Frere Iacques Clement, Pierre Barriere, Iean Chastel, de qui ont-ils esté enuoyez, pour entreprendre, faire, & executer ce que ie ne dois exprimer ny dire, pour l'execration apparente? n'est-ce pas le mesme esprit qui posseda jadis Erostrate boute-feu du temple de Diane: non pour esperance de salut qui fut en eux, ains pour perpetuer leur nom, & faire parler d'eux en la letanie de la sainte Ligue? L'execration de leurs faits me fait entrer en colere, mesmes quand ie les nomme, ou qu'il m'en souuient: que puissent-ils estre ensepuclis dedans les

5

ondes fluctueuses du Lethe infernal, & que leur memoire puisse estre vne torture & gehenne perpetuelle à tous ceux qui sont encores de ce faulx & mal-heureux party Espagnol, que l'on colore aujour-d'huy du riche & specieux émail de Religion, sous lequel on abuse impudemment du droit d'hospitalité, parentele, amitié, & autres saints liens, pour donner lieu aux frenetiques opinions des princes estrangers, & François desnaturez de ce Royaume, leurs adherants. Que ceulx de la Ligue nous facent apparoir de l'Apostolat & mission expresse de cestrois meurtriers, de leur esprit, & commandement qu'ils auoient de perpetrer telles choses.

Ils pourront nous supposer quelque faux Demon forgé de nouveau, ou bien quelque puissâce bastie & cōtrouée en la Synagogue des marrants Espagnols, ou bien en quelque classe & secret auriculaire de Iesuites. Où auons nous les yeux (mes chers concitoyens, & François) ou est nostre entendement? que à noz yeux voyants l'on attente sur la venerable & sacrée personne de nostre Roy, de la conseruation duquel despend l'entier repos de ce Royaume? où en sont les doleances, les cris, le dueil, & les gemissements? en quelles



tenebres, en quels troubles rentrions nous si l'ange du Dieu d'Abraham n'eust destourné le coup, que ce mal-heureux & déterminés estoit proposé de faire?

Ceux qui restent du naufrage de la Ligue, nous allegueront Iahel, Aod, Iehu, & Iudith, lesquels soubz couleur d'obeissance ietterent leurs mains vangeresses sur Sisare, Eglon, Iorā & Holoferne. En quoy soubz correction ils se trompent grandement, & tournent l'Escriture sainte suyuant l'inclination de leurs humeurs. Car qui est celuy d'un entendemēt si stupide, qui ne iugea ces quatre dignes de cent feux, de cent roües, voyre d'un million de tormēts, s'ils n'eussent esté particulièrement trieux & choisis de Dieu, pour delier les chesnes de la seruitude, en laquelle ils estoient constituez, & tout le peuple Hebrieux? & comme expressement appellés pour faire mourir ces Tyrans d'une mort autant ignominieuse que leur vie auoit esté tyrannique, meschante, & abominable?

Nostre Roy Henry quatriesme, à present regnant, n'est en rien comparable à ces quatre tyrans, payens & infidelles, entant qu'il est notoirement & naturelement nostre Roy

Tres-Chrestien, tref-Catholique, & plein de toute pieté.

Iahel femme de Haber Cineen, prophetisse & esleuée sur le peuple de Dieu, de son ordonnance & par le saint Esprit qui la possédoit, tua Sisare chef de l'armée de Iabin Roy de Chanaan, luy fichant en la temple vn cloux avec vn marteau, ainsi qu'il dormoit en son tabernacle: En quoy faisant elle sembloit auoir violé le droit d'hospitalité, l'ayāt humainement receu, & promist tout bon traitement en sa maison: Neantmoins elle est tenue pour sainte & beniste au cantique & actions de graces renduës par Debora & le Roy Barac, apres la victoire obtenue sur Sisare pres le mont de Thabor.

Aod semblablement homme de Dieu, & par luy indubitablement ordonné pour le salut des enfants d'Israël, avec vn glaue d'une coudée seulement & a deux tranchants, tua Eglon Roy de Moab, auquel ce peuple de Dieu estoit iniquement & par force tributaire, subiect à ses ordonnances tant pour le regard de la Religion, que pour la police humaine: & apres auoir ce fait il ferma la chambre d'Eglon avec l'assurance de l'Esprit saint qui l'asistoit, & se retira sain & sauf en Seirath,



& en la montagne d'Ephraïm, où les enfants d'Israël en rendirent l'ouïange a Dieu.

Le Roy Iehu fils de Josaphat, apres qu'il fut oinct & sacré Roy d'Israël, & sur iceluy estably par le saint Prophete Elisee, se transporta en Israël, où il mit à mort d'un coup de fleche Iora, aussi Roy d'Israël: & pour auoir ce faict suyuant l'ordonnance de ce prophete, estant inspiré de l'esprit du grand Dieu, & pour auoir aussi destruit, mis à neant, & esteint la maison du Tyran Achab, ses fils furent assis sur le throsne d'Israël iusques à la quatriesme generation: & fut à la fin de ses iours ensepueli fort religieusement en Samarie, avec ses pere & mere.

Iudith, se sauua miraculeusement & passa avec vne belle assuree au trauers de l'armee & du camp d'Holoferne, apres qu'elle eust coupé la teste a ce Tyran barbare, infidelle & ennemy du peuple de Dieu: & arriuee qu'elle fut en la ville de Bethulie, que ce tyran tenoit assiegée, elle y fut glorieusement receuë avec vne infinité de saintes allegresses & magnificences.

Il appert doncques notoirement & veritablement, comme ces saints personnages, apres auoir faict leurs coups sur ces tyrans, ennemis



ennemis de Dieu & de son peuple, se sont retirés comme ils estoient venus, sans aucune difficulté ny empeschement. Mais c'est tout autre chose de ces meurtriers, qui ont cy devant attété sur nos Roys, par la faulx & damnable instruction qu'on leur auoit donnée: car s'il fault iuger leur felons attentats, par le progres & éuenement d'iceux: En vertu de quelle mission & patente, se sont ils acheminez pour attenter sur les personnes de nos Roys sacrés! quel esprit, quel ange, quel prophete les a induits, acheminez & reconduits, apres leur forfait commis? sont ils eschappez comme Iahel, Aod, Iehu, & la sainte Iudith? au contraire, Dieu qui abhorre les meurtriers & hommes sanguinaires, a permis qu'ils ayent esté pris & apprehendez, l'un pour estre massacré & traîné à la voirie, comme fut celuy que *L'enfer crea*: L'autre pour estre rompu & mis sur vne roüe, sa main bruslée tenant le cousteau duquel il deuoit faire son coup: celuy est vostre Pierre Barriere: Le troisieme est ce Chastel dans lequel ces Hypocrites auoient mis & logé ceste damnable opinion, & lequel fut tenaillé aux bras & cuisses, & sa main dextre coppée, tenant en icelle le cousteau, duquel il s'estoit efforcé commettre le

parricide, son corps tiré & demembré avec quatre cheuaux, & ses membres & corps ietez au feu & consumez en cendres, pour estre iectées au vent. Voyla les corônes, les trophees, & les lauriers de voz saints martyrs & catholiques, puis qu'ainfi, mais faulſement, vous les qualifiez, contre l'honneur de Dieu & de ſon Eglise, comme ſi la peine & le torment faiſoient, ſans la cauſe, l'homme martyr en ce monde, au défaut de laquelle, celui qui paſſe par la main du Bourreau retient a iuſte tiltre & digne le nom de Voleur, Meurtrier, aſſacinateur & aultres telles ou ſemblables qualitez, & non de ſainct Martyr: car il faut par neceſſité, que la cauſe & la peine ſoient conioinctement en celui qui ſouffre, pour ſ'acquérir meritoirement la Couronne de Martyr, mais quelle cauſe pourriez vous trouuer en vos Meurtriers? ſur quoy fondée? ſi elle n'a pour fondement le zele que ces hypocrites portent, au bien & manutention de l'eſtat Eſpagnol, d'où ſont yſſus originairement ces perturbateurs de l'ordre & ancienne ierarchie de l'Eglise Catholique, ennemys iurés de noz roys & de leur eſtat.

Sa ſaincteté n'a iamais approuué voz felôs attentats, moins le ſainct ſiege & conſiſtoire



de Rome : bien ont ils accoustumé de faire passer par les Censures Ecclesiastiques , & excommunications ordinaires, ceux qui forligment du vray & legitime party de l'Eglise Catholique : mais en leurs Censures & Bulles ils n'ont iamais commandé de massacrer, empoisonner, ou tuer les Roys & les Princes: bien est vray qu'ils les ont seulement declarez estre membres desynis & separez du corps de l'Eglise, hors laquelle n'y a point de salut : de les tuer, cela ne se trouuera iamais.

C'est pourquoy aussi voz meurtriers n'estants approuvez de l'Eglise vniuerselle, Dieu a permis qu'ils ayent esté punis ignominieusement & selon leur demerite. Ainsi il en print à Iambri lequel tua Ela son maistre & seigneur fils de Baasa Roy de Therse, en laquelle après l'auoir tué il regna sept iours seulement : mais comme le seigneur & pere protecteur des enfants d'Israël, qui est seul scrutateur de noz intentions, sçauoit l'ambitieuse coniuration de Iambri, il suscita Amri assisté de son peuple, lequel assiegea la ville de Therse ou estoit Iambri, & preuoiant bien que la place n'estoit tenable, il se retira dedans le Palais Royal, qu'il mit en combustion, & comme vn vilain Sardanapale, se

laissa brusler & consumer au feu, punition digne de son demerite : encores que le Prophe-  
te Iehu luy eust ordonné de mettre à sac &  
ruiner entierement la maison & race du Roy  
Basa & de Ela son fils.

Ceux qui ietterent les mains sur Absalon  
ne furent-ils pas punis de mort, encores qu'il  
portast les armes contre son pere, son Roy,  
& sa patrie? aussi l'esprit de Dieu qui estoit  
en son pere David nous reuele par son orga-  
ne Royal, que le seigneur Dieu abhorre l'hô-  
me sanguinaire & frauduleux.

Et Dieu vueille que nostre Roy Henry qua-  
trieme puisse comme le susdit Amri avec son  
peuple, composé de ses vrays & legitimes  
subiects investir & assieger si a propos le grâd  
Iambri de la Ligue & ambitieuse faction, qu'il  
soit en fin contraint de nous laisser pour tou-  
tes reliques, ses cendres, à fin d'estre iectées  
au vent, & en perdre la memoire.

Telle a esté tousiours la fin des esprits am-  
bitieux & perturbateurs du repos public, en-  
nemis des vrays & legitimes Roys, & les-  
quels ne pouuants, à guerre ouuerte, mettre  
à effect leurs malitieux & diaboliques des-  
seings, employent des petits Aſsarots, mini-  
stres de leurs passions, à fin d'affaciner noz



Royz à tort & à droict sans aucune autorité ou vocation expresse.

Le proces en dernier ressort de ces meurtriers & de leurs instructeurs est tout fait au concile de Constance, session quinzième auquel n'a esté desrogé depuis, & voicy leur condamnation : *Declarat insuper, decernit & diffinit, quod pertinaciter doctrinam hanc perniciosissimam asserentes, sunt hæretici, & tanquam tales, iuxta canonicas sanctiones, puniendi.* Ce qui fut ainsi arresté en iceluy Concile sur la proposition, *Quilibet tyrannus* : mais ces venerables Iesuites, par presumption ou autrement, se declarent tacitement estre par dessus nostre saint Pere, & ce saint Concile.

Voyla cependant ce que l'auteur a mis en lumiere, contre la susdite damnable opinion, à fin de suruenir au simple peuple, que les meschants ont accoustumé de surprendre & circonuenir par vn faux desguisement des escritures saintes,

*Ainsi le faux Demon desguisa l'escriture  
Quand il voulut tenter du monde le Sauueur,  
Luy proposant alors, sous faulx conuerture,  
Des celestes courriers l'assistance & faueur.*

Bref, il se faut donner garde des faux Prophetes, & de ces orateurs mercenaires, les-

quels estans en chaire tournent & virent le sens de l'escriture sainte, à l'equivalent de leurs pensions & passions Castillanes, laissant la sincere interpretation des saints Docteurs de l'Eglise, pour prescher & annoncer impudemment l'apothecose de leurs faux Machabées & parricides, que nous deurions plus abhorrer que les abominables pechez de Sodome & Gomorre.

Dieu par son saint esprit les veille aduifer, & leur faire la grace d'enseigner ce qui est à sa gloire, manutention de son Eglise Catholique, obseruation de noz legitimes Roys, repos & tranquillité du public.

F I N.





